



## BIBLIAKSĪNI UÁTI JARHUANI SÁNDERU SÉSI IREKANI



Vol. 1, núm. 3 2019 PURÉPECHA

Rebista mámaru jástí formatu jimbo: 78,282,000  
Jarhasti 212 IDIOMECHA jimbo

*¡Tsínharhi!* is published quarterly by Watchtower Bible and Tract Society of New York, Inc.  
© 2019 Watch Tower Bible and Tract Society of Pennsylvania.

Para MÉXICO KA CENTROAMÉRICA  
Congregación Cristiana  
de los Testigos de Jehová, A.R.  
Apartado Postal 895  
06002 Ciudad de México  
México

Exentaakajtsí lista ma iámindu  
direksionicha jingoni ixú  
[www.jw.org/tsz/nena-karani-o-uandani](http://www.jw.org/tsz/nena-karani-o-uandani).

## AMBE ENGA JATAKA

# Bibliaksini uáti jarhuani sánderu sési irekani

3 lóntki anapu libru ma engá iási  
kánikua marhuajka

4 No xáni p'amenchani

6 Sési p'ikuarherani

8 Sési pájperani familia ka  
amiguecha jingoni

10 Sési úrani tumina

12 Sési pájperani Tata Diosini jingoni

14 Libru ma engá kánikua jarhuajpikia

16 Bibliaksini uáti jarhuani sánderu  
sési irekani



¿Uékasintsí mitini sánderu  
ambe o parajtsí gratisi jorhen-  
guarhini Bibliaeri ambe chári  
k'umanchikuarhu?

Exe je [www.jw.org/tsz](http://www.jw.org/tsz)

o karachijtsini je ma indeni  
direksionicha jimbo engaksí  
karakua jaka.

Ari publikasioni jindesti para jorhenguarhini Bibliaeri ambe, ka ánychikuarhita máesti engá úkuarhejka iámindu parhakupinirhu, jarhuatakuarhiparini imani tuminani jimbo engaksí k'uiripuecha íntspijka tsípikua jingoni. I publikasioni no ataranhantasindi. Engajtsí uéjka íntspini sáni tumina, exe je [donate.jw.org](http://donate.jw.org). Enga no karakata jauaka máteru ambe, tekstuecha karakata griegaecheri p'itakataksí jarhasti Bibliarhu *Jimbanj Eiatsperakua Tata Jesukristueri* (iástí anapu karantskatani jimbo). Tekstuecha karakata ebraecheri p'itakataksí jarhasti ixú *La Biblia. Traducción del Nuevo Mundo, TNM*.

# Ióntki anapu libru ma enga íásĩ kánikua marhuajka

Uánikua k'uiripuechaksĩ jukaparharasĩndi Bibliani jimboka Tata Diosĩri Karakateska. Peru Biblia, no solu Tata Diosĩri ambe uandasĩndi, ístujsĩni ambakiti jarhuajperata íntskusĩndi parachi sési irekani.

Exe je por ejemplu, ambe engaksĩ uandaka máru k'uiripuecha na enga xáni marhuakuakia arhintani ka úni ambe enga Biblia arhijka.

**“Sánderuni sési irekaxakaia. Ístuni sánderuni sési p'ikuarherasĩnguia ka ambakiti ambe eratsini. Tsípikua jingoni irekaska” (Fiona).**

**“Bibliaeri ambe jorhenguarrhini, ústi eskani tsípikua jingoni uáka ambe ma” (Elena).**

**“Íásĩ sánderuni sési irekaxakaia: nóteruni xáni ánkikuarhisĩnguia ka sánderuni juchiti familia jingoni jarhasĩnguia” (Andrew).**

Íksĩ solu tanimu ejempluesti, jimbokaksĩ uánikua k'uiripuecha, interu parhakupini anapuecha, exeskia eska ambe enga arhijka Biblia kánikua jarhuataasĩnga.

Joperu nénajtsĩni uá jarhuatani Biblia parachi:

- No xáni p'amenchani
- Sési p'ikuarherani
- Sési pájperani familia ka amiguecha jingoni
- Sési úrani tumina
- Sési pájperani Tata Diosĩni jingoni



Máteru pájinecharhu, exeakachi eska Biblia no solu libru máeska enga Tata Diosĩri ambe uandajka, ístu libru máesti engajtsĩni uáka jarhuatani parachi sési irekani.



## No xáni p'amenchani

Biblia, no libru máesti enga s'piatiri ambe uandajka perujts'ini k'óru arhis'indi nénachi uá no xáni p'amenchani. Ju je exeani máru karakatechani engajts'ini jarhuataaka no xáni p'amenchani.

### KUIDARINI JUCHARI KUERPUNI

**BIBLIAERI KARAKATA:** “No nema jarhasti enga no exenchajka imeri mismu kuerpuni, sino mejori sési t'ireras'indi ka kuidarini” (Efesu 5:29).

**AMBE ARHIKUEKAS'INI.** I karakatajts'ini p'imarhis'indi parachi jánguarhintani kuidarini juchari kuerpuni. Exenhastia eska enga nema jukari p'amenchajka jindeska jimboka no p'indeska kuidarikuarhini. Jiájkani, engachi p'indeaka kuidarikuarhini, nochi xáni p'amenchaaka.

### AMBEJTS'Í UÁ ÚNI

- **Sési t'ireni.** Jánguarhi je imani ambe t'ireni engaks'ini marhuachiaka ka kánikua itsimani.
- **Ánchitani kuerpuni.** Na uéjkijts' xáni jatirini,

engajts'í ánychitaaka chári kuerpuni uáti úni eskajts'í sési p'ikuarheraaka, nájkirukajts'í uinhamu p'amechani jauaka o chári kuerpu no sési jarhani. Chári familia o doktori ma, uátiks'ini jarhuani ejersisiu úni, joperu chás'í jatsika para jánguarhintani.

- **Sési k'uíni.** Ima k'uiripuecha engaks'í no ióni k'uíjka, uátiks'í uinhamu p'amenchani. Uáni-kua k'uiripuechaks'í no ióni k'uís'indi jimbokaks'í uékas'inga máteru ambe úni jarhani. Joperu imecha engaks'í sési k'uíjka, sésiks'í p'ikuarheras'indi.

### JURAJKUNI NO SÉSI JÁS'Í AMBE

**BIBLIAERI KARAKATA:** “Jaue pímbinhas'itani para iámindu indeni no sési jási ambe jingoni enga kuerpu újka” (2 Korintu 7:1).

**AMBE ARHIKUEKAS'INI.** Nójts'í xáni p'amenchaaka engajts'í no úraaka imani ambe enga chári kuerpuni no sési úkuaka komu itsutani, ma ambe engaks'í jimbo uánikua k'uiripuecha p'amenchajka ka uarhini.

## MÁTERU BIBLIAERI KARAKATECHA

### ERATSIKUA JUKARIINI

“Engari k’umanchikua ma uáka, jatsiskari para karhakua, barda sapichu ma jatsirhukuni iámu uirhipandani. Para no chíti k’u-manchikua kulpa jatsini enga nema niáraska uarhini jimboka jima uératini uékorhintaska”

(DEUTERONOMIO 22:8).

### NO SÓNTKU IKIANI

“Ima enga no sóntku ikiajka kánikua jánhaskatisti, peru ima enga no tekaantajka xarha-tasíndi eska tontu máeska”

(PROVERBIOS 14:29).

### NO JUKARI ARHANI AMBE MA

‘Así ja imecha jingoni engaksí ísku jatini jukari t’írejka’

(PROVERBIOS 23:20).

**AMBEJTSÍ UÁ ÚNI.** Péra je jurhiatikua ma káni engajtsí uékajka nóteru itsutania. Ante de ima jurhiatikua, k’uanikua je iámindu sigarruechani, sigarru jataquechani, ima ambe enga sigarruni érutajka o ambe uéjki máteru i jásí ambe. Así ní je jima enga k’uiripu itsutajka. Arhia je chári amiguechani ka familiarichani eskajtsí nóteru uékasínguia itsutani paraksíni jarhuatani.



Engajtsí uékajka Biblia ma, kurhaku je Jeobaeri testiguni ma enga chári ire-tarhu anapueka.



## Sési p'ikuarherani

Biblia arhisindi eskachi jánguarhintaaka no imani ambe p'ikuarherani engajtsini no marhuachiaka, sánderu sési, eskachi imani ambe p'ikuarheraaka engajtsini marhuachijka.

### IKIATAPU

**BIBLIAERI KARAKATA:** “Ima engu no sóntku ikiajka, sánderu ambakitisti ka eska ima k'uiripu engu uinhapitiika” (Proverbios 16:32).

**AMBE ARHIKUEKASINI.** Sésisti engachi jorhenguarihiaka p'ingukuarhini parachi no sóntku ikiani. Nájkirukachi ménisi jatsiaka ambe ma engachi jimbo ikiani jauaka, engachi no p'ingukuarhiska kánikuaajtsini no sési nicheati. Engu nema iámindu ambe jimbo kururaxejka, sáno méntkisi imani ambe uandasindi o úni engu tátsekua p'amondakuarhijka.

**AMBEJTSÍ UÁ ÚNI.** Jorhenguarihi je p'inguni ikiatapuni ante dejtsi tátsekua puru ikiani jámania. Máruksi uandasindi eska engu nema jukari ikiajka, xarhatašinga eska no nema úšinga juramukuni joperu

ambe engu xarhatajka jindesti eska ikiatapu juramukusinga. “Komueska k'éri ireta ma engu k'amajkunhaka, engu no jukaka barda, íšisti ima k'uiripu engu no újka p'inguni imeri ikiatapuni” (Proverbios 25:28). Sési míteni nénaši úkuarhi ambe ma, jarhuataatiksini paraajtsi no ikiani. Biblia uandasindi: “K'uiripuuri jánhaskakua jarhuatasindi p'inguni imeri ikiatapuni” (Proverbios 19:11). Engajtsi jingontku kurhaaska iámindu ambe engu xáni úkuarhika, i ambeksini jarhuataati kurhanguni ambe ma ka nójtsi ikiani.

### DIOSMAIAMUKUA ÍNTSPINTANI

**BIBLIAERI KARAKATA:** ‘Méntku jauena je diosmaiamukua arhipini’ (Kolosasi 3:15).

**AMBE ARHIKUEKASINI.** Máruksi uandasindi eska kisi ima k'uiripuechajkusi tsipikua jingoni irekajka engaksi diosmaiamukua íntspintajka. Asta imecha engaksi tsitakuarhika ambe ma mítestiksi eska i ambe ísiska. Exesindikisi eska agradeserini imani ambe engaksi jatsika ka nóksi uandanhiani jarhani imani ambe jimbo engaksi tsitakuarhika, jarhuataasinga paraksi no kómu p'ikuarherani jarhani.

## MÁTERU BIBLIAERI KARAKATECHA

### NO JÁMANI ARHIRPERANI

“Uénani arhirperani, ísísti komu k’éri puerta ma mítani; ante de uénani uarhiperakua, kéndikukuarhi”

(PROVERBIOS 17:14).

### NO UANDANHIANI SÁNDERU ORHEPANI JIMBO

“Así jáma je pendiente páni para ambe enga úkuarhiaka pauani, jimboka pauantu jauaka miskuarhita ambe. Ka sésku kánisti miskuarhita mándani jurhiatikueri”

(MATEU 6:34).

### ERATSINTANI ANTE DE ÚNI AMBE MA

“Chíti eratsikuakini kuidarini jauati, ka jánhaskakuakini níáraati kuájchakuni”

(PROVERBIOS 2:11).

**AMBEJTSÍ UÁ ÚNI.** Pauani pauani, eratsi je o kara je imani ambe engajtsí jimbo agradesidu jaka. No uétarhisíndi eska k’éri ambeuaka, uáti sapichitu ambeni, komu enga ménderu erandika, ambakiti uandonskuarheta ma nema jingoni o jimbokajtsí sésikua jatsiska máteru jurhiatikua irekani. Engajtsí jánguarhintaska ini ambe úni, jarhuataatiksíni parajtsí tsípikua jingoni irekani.

Ambe ma engaksíni kánikua jarhuataaka, jindesti diosmaiamukua íntsantaani chári familiarichani ka amiguechani. Eratsi je ambe engajtsí jukaparharajka imecheri ambe ka tátsekua arhia je imechani japarini o karta ma jimbo, korreu elektroniku o mensaji ma jimbo. Ísijtsí uáka sánderu sési pájperani imecha jingoni ka sésijtsí p’ikuarheraaka jimbo-kajtsí ambakiti ambe úni jauaka para máteruecha (Ukuecha 20:35).



Uákajtsí kékuni Bibliani parajtsí kurhaani, pájinarhu [jw.org](http://jw.org) enga 40 idiomecha jimbo jaka.



# Sési pájperani familia ka amiguecha jingoni

Uánikua k'uiripuechaksí no úsindi sési pájperani máteruecha jingoni. Ju je exeani máru Bibliaeri karakatechani engajtsíni jarhuataaka sési pájperani máteruecha jingoni.

## UANDANHIANI MÁTERUECHANI

**BIBLIAERI KARAKATA:** Jánguarhi je “no solu pendiente páni para chájku mindu sési uérani, sino ístu pendiente páni para máteruecha” (Filipusa 2:4).

**AMBE ARHIKUEKASĪNI.** Parachi sési pájperani máteruecha jingoni, jatsiskachi para intsimpitini ka no solu uékani eskachi intsimbinhaaka ambe ma. No eratsiani máteruechani, k'amajkusindi ambakiti pájperakua ma. Por ejemplu, temungurhirkuarhu, enga acheeti o uarhiiti imajku eratsikuarhiska, jamberi níaraati ísku jándikua ambe niátani. Ka ima enga méntku ima amberi uandani jarhajka ambe enga xáni jatsika o míteni, no ma amigu jingoni pakaraati. Jimbanhi libru ma uandasindi eskaksí ima k'uiripuecha engaksí imechajku eratsikuarhijka, uánikua problemechanksí jatsiasínga.

## AMBEJTSĪ UÁ ÚNI

- **Jarhuajpini.** Ambakiti amigu ma mintsinharhi-kuesti ka listu jarhasíndi para jarhuajpini. Seguni informi ma, ima k'uiripuecha engaksí uandanhajka máteruechani, nóksí xáni jandiajku p'ikuarherasíndi ka jukaparharakuarenksí.
- **Kurhangutspini.** I ambe arhikuekasíndi eskajtsí chári mintsitarhu p'ikuarhinhiaka na engaksí p'ikuarherajka máteruecha. Engajtsí kurhangutspiska, sánderujtsí no úrauaka imani uandakuechani engaksí ísíka komueska chiste ma peru engaksí úrakuarhijka para no sési p'ikuastpini.  
Kurhangutspini, ístu jarhuajpisíndi parajtsí jaipanhiantaani máteruechani. Jiájkani, i ambeksíni jarhuataati parajtsí úni iáminduecha jingoni sési pájperani ka uápurisí anapu amiguechani jatsiani engaksí mámaru jásí p'indekuechani jatsiaka.
- **Arhutani tiempu para máteruecha.** Parajtsí úni miteani máteruechani, jatsiskajtsí para imecha jingoni jarhani. Parajtsí úni ambakiti amigue-

## MÁTERU BIBLIAERI KARAKATECHA

### NO UANDANI IMANI AMBE ENGA NO SÉSI P'IKUASTPIJKA

“Jarhasti ima engu no eratsiparini uandajka engu ísika eska espada jimbo ch'urhupini jarhani”

(PROVERBIOS 12:18).

### INTSĪMPITIINI

‘Ima k'uiripuni engu intsĭmpitika, sési nikuati’

(PROVERBIOS 11:25).

### ÍSĪ KÁMPINI ESKACHI NA UÉJKA ESKAJTSĪNI KÁMAAKA

“Esku cha na uékajka eskaksĭni kámaaka k'uiripuecha, chájtu ísí kaa je imechani iámindu ambe jimbo”

(MATEU 7:12).


chani jatsiani, jatsiskajtsĭ para ima amberi uandaxeni engu uandanihiataajka ka engaksĭ imecha jukaparharajka. Ísí jimbo, jorhengarhi je jingontku kurhajchaani chári amiguechani ka uandanhiani imecha jimbo. Jimbanhi informasioni ma uandasĭndi eska “ima k'uiripuecha engaksĭ sési uandontskuarhejka, sánderuksĭ sési irekasĭnga”.

### SÉSI ERAKUANI AMIGUECHANI

**BIBLIAERI KARAKATA:** “Engu nema kúrhiaska no sési úrichani, ikichakua úkuarhiatiksĭ imeri ambarhati úkuecha” (1 Korintu 15:33).

**AMBE ARHIKUEKASĪNI.** Imecha engajtsĭ jingoni kúnguarhijka, uátiksĭni ambakiti ambe úrani o no sési ambe. Imecha engaksĭ k'uiripuerti jánguanu estuarijka (sociólogos) uandasĭndiksĭ eska i ambe ísíka. Por ejemplu, uandasĭndiksĭ eska imecha engaksĭ imani k'uiripuechani kúrhiaska engaksĭ itsutajka o engaksĭ ísku jatini jurajkujka uám-bani o témbani, jámberiksĭ níaraati májkueni ambe úni.

**AMBEJTSĪ UÁ ÚNI.** Imani amiguechani jirinhaa je engaksĭ imani ambarhati p'indekuechani ka úkuechani jatsiaka engajtsĭ cha jukaparharaajka ka uékantsĭ terokukuantaani. Por ejemplu, imechani engaksĭ jánhaskakua jingoni jámajka, janhanharpini, intsĭmpitini ka engaksĭ sési kámpijka.



Exea je bideuechani engaksĭ Bibliarhu p'itakata jaka para jarhuataani temungurhirichani, tumbiichani ka sapiichani paraksĭ sánderu sési pájperani familia jingoni.



## Sési úrani tumina

Uánikua k'uiripuechaksí ústia exeni néna no xáni uandanihiata ambe jatsini tumina ambe jimbo, Bibliaeri karakatechani úrapariani.

### ERATSINI AMBE ÚNI

**BIBLIAERI KARAKATA:** “Sési nikuati imani enga áchikuarhirika enga sési eratsintaaka ambe enga uáka; joperu ima enga jirejiresí uáka ambe ma, níaraati pobri pakarani” (Proverbios 21:5).

**AMBE ARHIKUEKASÍNI.** Para sési uérani ambe ma, uétarhisíndi sési eratsikuntani ambe enga uáka ka ísimindu úni. Miá je eskajtsí no uáka piáni íámin-du ambe engajtsí uéjka. Ísí jimbo, sési eratsi je né-najtsí uá úrani chári tuminani.

### AMBEJTSÍ UÁ ÚNI

- **Exe je na xántsí ataraa.** Kara je ambe engajtsí xáni piáka ka ambe enga sánderu uétarhiaka. Tátsekua, arhuta je na xántsí ataraa para mán-dani ambe. Engajtsí uétarhinchaaka sánderu tumina para imani ambe maiampini engajtsí no andangutaka, máteru nani p'ikurhuku je.

Por ejemplu, engajtsí jukari úraka para gasoli-na, imani tumina jimbo p'ikurhuku je engajtsí arhutapka para imani ambe enga no xáni juka-parhakueka, komu uérakua ísí t'ireni.

- **Jánguarhi je no kántspeni.** Así ísku jatini jóp-cha je. Sánderu sési, ante de piáni ambe ma, orheta tána je tuminani. Engajtsí tarjeta de kré-ditu úrajka, jánguarhi je mándani kutsí maiam-pini na engajtsí xáni kántspeni jauaka parajtsí no tátsekua andakua jingoni maiampini. Ka en-gajtsí kántspini jakaia, exe je nénajtsí maiam-pinta ka jánguarhi je ísí úni.

Exenhastia eska sáno méntkisí sánderu tumina úrakuarhisínga enga nema tarjeta de kréditu jimbo maiampijka. Ísí jimbo, jánguarhi je sési úrani.

### JÁNGUARHINI AMBAKITI AMBE ÚNI

**BIBLIAERI KARAKATA:** “Ima enga xépejka no ué-kaśíndi tarheni imani tiempu jimbo enga iauajka; ísí jimbo kómu nitamakuarhiati jiáni enga p'ikunts-kueuaka, enga no ma ambe jatsikuarhiaka” (Proverbios 20:4).

## MÁTERU BIBLIAERI KARAKATECHA

### NO ÚRANI TIEMPU NI TUMINA PARA BISIU AMBE

“Kauicha ka ima enga ísku jatini jukari t’irejka, niáraatiksĩ pobri pakarani ka k’uínchakua jimbo, niáraatiksĩ imani ambe jukan-tani enga iámu jiánguarhikia”

(PROVERBIOS 23:21).

### NO JUKARI UANDANHIANI TUMINA JIMBO

“Asĩ jáma je jaakuarhini [o uandanhiani] na engajtsĩ nitamaa-ka, ambe engajtsĩ t’ireaka o ambe engajtsĩ itsĩmaaka, ka ni para kuerpu, ambe engajtsĩ xukuparaaka”

(MATEU 6:25).

### NO ENBIDIARPINI


“Ima k’uiripu enga iámindu ambe enbidiarijka, uarhisĩndi jatsikuarhikua ambe xáni tsitini, no míteparini eska niáraaka pobri pakarani”

(PROVERBIOS 28:22).

**AMBE ARHIKUEKASĨNI.** Xépekua, niárasĩndi nemanĩ pobri pakatani. Ísĩ jimbo, jánguarhi je áńchikuarhirini ka sési úrani chári tumina parajtsĩ jatsini ambe enga uétarhiaka sánderu orhepani.

### AMBEJTSĨ UÁ ÚNI

- **Áńchikuarhirini.** Engajtsĩ áńchikuarhiriska ka mintsinharhikueni, sánderu fásiliuati eskajtsĩ ióni jamberi jatsiaka áńchikuarhita ma. Patronichaksĩ jukaparharaasĩndi imechani engaksĩ uinhamu áńchikuarhijka.
- **No sĭpani.** Engajtsĩ sĭpaska ambe ma áńchikuarhitarhu, máteru k’uiripuechaksĩ niáraati miteni ka tátsekuaksĩni no nema uékaati íntskuni áńchikuarhita.
- **No jukari tsitini tumina jatsini.** Engajtsĩ uékaa-ka sánderu ka sánderu tumina andani, sáńhane arhiakajtsĩ p’amenchakua ambe p’irani ka no sési pájperani máteruecha jingoni. Miá je: jarhasti máteru ambe enga sánderu jukaparhakeka eska tumina.



Uákajtsĩ arhintani Bibliani pájinarhu [jw.org](http://jw.org) enga uánikua idiomecha jimbo jaka.



## Sési pájperani Tata Diosini jingoni

Eskachi na exeka uénakuarhu i rebisteri, uánikua k’uiripuechaksí exesíndi eska Biblia Tata Diosiri Karakateska. Engaksí arhintajka ka únksí ambe enga arhijka, sánderuksí andarhasíndi Tata Diosini ka kurhanguni andiksíi irekani jaki.

Biblia arhisíndi eska ima k’uiripu enga ‘espiritua- lika’, o enga jánguarhintajka sési pájperani Tata Diosini jingoni, jukaparharasinga ambe enga eratsijka ima ka méntkisí úni ambe enga ima ué- kajka. Peru ima k’uiripu enga no jukaparharajka Tata Diosiri jarhuajperata, imeri eratsikuani min- tsikasíndi ka imani ambe úni enga ima uéjka (Ju- dasa 18, 19, *TNM*; Efesu 5:1). Uánikua ambe jim- bojtsini marhuachesíndi engachi jurajkujka eskajtsini Tata Diosi jarhuataaka.

### EROKUARHIKUACHI MA JATSISİNGA

**BIBLIAERI KARATAKA:** “Engari chketakuarhiska jiani engari no sési nitamani jauaka, nóri xani uin- hapiti jauaka” (Proverbios 24:10).

**AMBE ARHIKUEKASINI.** Engachi chketakuarhijka,

i ambe úsindi eskachi no uinhapiti jauaka parachi orhepani uérakuani uandanhiatechani. Peru enga- chi erokuarhikua ma jatsijka, niárasingachi exeni eskaksí sáno iámindu juchari uandanhiatecha ma ratitkuesinga ka eska asta niárasinga ambakiti ambe jarhani enga na nitamajkia no sési jási ambe.

**AMBEJTSI UÁ ÚNI.** Jánguarhi je eranhaskani eska sánderu orhepani puru ambakiti ambe úkua- rhiaka. Enbesi de uandanhiani jarhani imani ambe jimbo enga *úpiringa* úkuarhini o erokuarhini ja- rhani astaka niáraaka ambakiti jurhiatikua ma para ambe ma úni, uéna je ánychikuarhini imani ambe jimbo. Ísisti, méntkisí úkuarhisíndi ambe ma engachi no erokuarhini jarhajka (Eclesiastés 9:11). Peru sáno méntkisí, ambe ma sési k’amarukusín- di ka no ísi eskachi na eranhaskani jarhajka. Biblia ejemplu ma úrasíndi k’uiripueri ma enga echerini áchitajka, arhisíndi: “Tsipa jatsinta chíti se- miiani ka eskaksí chíti jájkicha no ísku jauaka asta inchatirhu jamberi; jimbokari no míteska náki niá- raa sési tsikini, i o ima, o sinksí tsimarhani uá tsi- kini” (Eclesiastés 11:6).

## MÁTERU BIBLIAERI KARAKATECHA

### JÍÓKUARHINI ESKACHI UÉTARHINCHASÍNGA TATA DIOSĪNI

“Tsípisiĩdiksĩ ima engaksĩ míteka eskaksĩ uétarhinchasínga jorhenguvarhini Tata Diosĩri ambe”

(MATEU 5:3, *TNM*).

### SÁNDERU SÉSI MÍTENI IMANI TATA DIOSĪNI ENGA BIBLIA UANDAJKA

“Andarhera je Diosĩni, ka imajtuksĩni andarheraati cháńksĩni”

(SANTIAGU 4:8).

### ARHINTANI BIBLIANI KA ERATSINTANI AMBE ENGA ARHIJKA

“Kánikua tsípikuarhisĩndi Jeobaeri\* leini jimbo, ka chúrikua ka jurhiakua eratsintaparini arhintasĩndi imeri leini. [...] Ka iámindu ambe engu uáka sési uérakuati”

(SALMO 1:2, 3).

## MÍTENI MÓKUNTSKUA AMBAKITI KURHAMARHIKUECHERI


**BIBLIAERI KARATAKA:** ‘Tata Diosĩri karakata jurhimbikuesti’ (Salmo 119:160).

**AMBE ARHIKUEKASĪNI.** Biblia mókuantasĩndi imani kurhamarhikuechani engachi sáno iáminduecha úkuarhiajka. Por ejemplu ari járhati kurhamarhikuechani:

- ¿Nanichi uératini jurhaski?
- ¿Andichisĩ xáni kómu nitamajki?
- ¿Ambechi úkuarhinchasĩni engachi uarhijka?
- ¿Ambe úkuarhia sánderu orhepani?

Uánikua k’uiripuecha interu parhakupini anapu, exestiksía ambe engu uandajka Biblia i kurhamarhikuecheri ka máteruecheri ka iásĩksĩ sánderu sési irekaxatia.

**AMBEJTSĪ UÁ ÚNI.** P’ímarhisĩngaksĩni parajtsĩ cha mismu exeni ambe engu Biblia jorhentpijka. Kurhaku je Jeobaeri testiguni ma paraksĩni jarhuani kurhanguni. Ístujtsĩ uáka exeni juchari pájinani jw.org o nirani juchari tánguarhikuecharhu. Nóksĩni ma tumina kurhachiatĩ inchanĩ jámani ka ni engajtsĩ incharini jauakia.



Incha je pájinarhu [jw.org](http://jw.org) ka exe je bideuni ¿Andisĩ uétarhijki jorhenguvarhini Bibliaeri ambe?, engu 880 idiomecha jimbo jaka.

\* Biblia uandasĩndi eska Tata Diosĩ arhinhasínga Jeoba.

# LIBRU MA ENGA KÁNIKUA JARHUAJPIKIA

Biblia jindesti libru engu sánderu tradusirinhakia ka etsakunhani interu parhakpinirhu. I ambe arhikuekasíndi eska no ma libru jarhaska ísí eska Biblia engu xáni jarhuataakia k'uiripuechani. Exe je ari informasionini.

## NA ENGA XÁNI TRADUSIRINHAKIA KA ETSAKUNHANI BIBLIA



# 5,000 MIIONI

**3,350** idiomecha

JIMBO JARHASTI BIBLIA  
IÁMU O MA PARTI

Bibliauechaksí etsakunhastia. No ma libru jarhasti engu xáni etsakunhakia.

## PARAJTSÍ SÁNDERU MÍTENI

EXE JE PÁJINANI JW.ORG KA UÁKAJTSÍ:

- Arhintani Bibliani Internetirhu (uánikua idiomecha jimbo jarhasti)
- Késkuni Biblia ma
- Mókuantani Bibliaeri kurhamarhikuechani
- Arhintani informasioni engu xarhatajka na engu Biblia jarhuataakia uánikua k'uiripuechani paraksí sési irekani
- Jorhenguvarhini Bibliaeri ambe Interneti jimbo \*
- Kurhajkuarhini Bibliaeri ambe jorhenguvarhini

\* láiasí solu inglesí ka portuguesí jimbo jarhasti.  
Sánderu orhepani jauati máteru idiomecha jimbo.




## NA ENGAKSĪ XĀNI ETSAKUAKIA BIBLIAUECHANI JEOBAERI TESTIGUECHA

JEOBAERI TESTIGUECHACHI  
JĀNGUARHINTASIŅGA TRADUSIRINI  
KA ETSAKUNI BIBLIANI.

Ariksī jindesti máru Bibliaeri traduksionicha engachi niárakia etsakuani:

- *American Standard Version* 1901 anapu
- *The Bible in Living English*, de Byington
- *The Emphatic Diaglott*
- *King James Version*
- *New Testament*, de Tischendorf
- *Versión Moderna* 1929 anapu

## BIBLIA TRADUCCIÓN DEL NUEVO MUNDO



**+180**  
idiomecha

JIMBO JARHASTI BIBLIA  
IÁMU O MA PARTI

**227 MIIONI**

BIBLIAUECHANKSĪ  
PETAASTIA TRADUCCIÓN  
DEL NUEVO MUNDO  
DESDE 1950 UÉRATINI

# INI REBISTARHU ;TSÍN HARHI!

## BIBLIAKSĪNI UÁTI JARHUANI SÁNDERU SĒSI IREKANI

### Ióntki anapu libru ma enga iási kánikua marhuajka


Biblia no solu Tata Diosiri ambe uanda-  
sindi. Ístu ambakiti konsejuechani jataasti  
engajtsĩni jarhuatajka parachi:

- No xáni p'amenchani
- Sési p'ikuarherani
- Sési pájperani familia  
ka amiguecha jingoni
- Sési úrani tumina
- Sési pájperani Tata Diosĩni  
jingoni

### Libru ma enga kánikua jarhuajpikia

Desde iónisĩa, Biblia jarhuatastia k'uir-  
ipuni sánderu sési irekani. Iási, uánikua  
idiomecha jimbo jarhastia. Exe je néna-  
ksĩni uá jarhuatani Bibliaeri ambakiti  
konsejuecha.



 Késku je gratisi  
ini rebistani ka  
engaksĩ antesi  
uérika.



Arhinta je Bibliani  
Internetirhu;  
jarhasti jukari 150  
idiomecha jimbo

Exe je pájinani  
[jw.org](http://jw.org)® o  
eskaniari je  
ini kódiguni



919.3-TBS  
190615